

**Sumáriu Kazu
 Tribunál Distritál Suai
 Períodu Juňu 2017**

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru feto no ema vulnerable. JSMP afirma la iha justifikasaun ba violénsia hasoru feto.

A. Sumáriu prosesu julgamentu kazu iha Tribunál Distritál Suai

1. Totál kazu ne'ebé JSMP monitoriza: 23

Artigu sira	Tipu kazu	Númeru kazu
Artigu 145 Kódigu Penál (KP) no konjuga ho artigu 2, 3, 35 no 36 LKVD	Ofensa ba integridade física simples ho natureza violénsia doméstica no tipu ilísitu sira kona-ba violénsia doméstica	11
Artigu 177 KP	Abuzu seksuál ba menór	2
Artigu 157	Ameasa	2
Artigu 145	Ofensa ba integridade física simples	1
Artigu 172	Violasaun seksuál	1
Artigu 139	Omisídui agravadu	1
Artigu 225	La halo tuir obrigasaun alimentár	1
Artigu 252	Furtu agravadu	1
Artigu 303	Falsifikasiun ba dokumentu ka notasaun téknika	1
Artigu 314	Fraude fiskál	1
Artigu 316	Kontrabandu	1
Totál		23

2. Totál desizaun ne'ebé JSMP monitoriza: 16

Tipu desizaun	Númeru desizaun
Suspensaun ba prizaun nia ezekusaun – artigu 68 KP	9
Omologa dezisténsia keixa	3
Pena prizaun – artigu 66 KP	2
Pena multa – artigu 67 KP	1
Absolve	1
Totál	16

3. Total kazu sira ne'ebé adia tuir JSMP nia monitorizasaun: 3

Razaun adiamantu	Númeru kazu
Arguidu nain rua la marka prezensa	2
Arguidu la marka prezensa	1
Arguidu ho lezada la marka prezensa	1
Totál	4

4. Totál kazu sira ne'ebé sei kontinua prosesu tuir JSMP nia monitorizasaun: 3

B. Deskripsiun sumáriu ba desizaun kazu sira

1. Krime ofensa ba integridade física simples ho natureza violénsia doméstika

Nú. Prosesu : 0002/15/CVFTM
 Kompozisaun Tribunál : Singulár
 Juis : Dr. Argentino Luisa Nunes
 Prokuradór : Dr. Napoleão Soares da Silva
 Defeza : Dr. Albino de Jesus Pereira
 Tipu pena : Pena prizaun tinan 1 suspende ba tinan 2 fulan 6

Iha 12 Juñu 2017, Tribunál Distritál Suai prezide julgamentu leitura sentesa ba krime ofensa ba integridade física simples ho natureza violénsia doméstika ne'ebé envolve arguidu RA hasoru nia feen, iha Distritu Covalima.

Akuzasaun hosi Prokuradór

Prokuradòr akuza katak iha 28 Agostu 2015, arguidu basa dala 1 iha lezada nia hasan parte loos, buti lezada nia kakorok no tebe dala 1 iha lezada nia kotuk laran. Agresaun ne'e resulta lezada sofre moras no bubu iha lezada nia hasan no kotuk laran.

Prokuradór akuza arguidu kontra artigu 145 Kódigu Penál kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3 no 35 alinea (b) LKVD.

Produsaun ba prova

Iha julgamentu, arguidu konfesa faktus hotu iha akuzasaun, deklara katak arrepende ona nia hahalok no foin primeira-vez mai hatan iha Tribunál. Iha parte seluk lezada konfirma no kontinua reforsa faktus sira iha akuzasaun.

Alegasaun finál

Prokuradór konsidera arguidu provadu komete krime hasoru lezada, tanba ne'e husu ba Tribunál atu kondena arguidu ho pena prizaun tinan 1 suspende ba tinan 2 nu'udar prevensaun atu iha futuru arguidu la repete ninia hahalok ne'e.

Enkuantu Defeza husu ba Tribunál atu aplika pena ne'ebé adekuada ba arguidu, tanba arguidu konfesa faktus hotu iha akuzasaun, arrepende ona nia hahalok no foin primeira-vez mai hatan iha Tribunál.

Desizaun

Tribunál prova katak arguida provadu komete krime hasoru lezada, no bazeia ba provas sira ne'e Tribunál konklui prosesu ne'e no kondena arguidu ho pena prizaun tinan 1 suspende ba tinan 2.

2. Krime ofensa ba integridade física simples ho natureza violénsia doméstika

Nú. Prosesu	: 006/17/CVMCT
Kompozisaun Tribunál	: Singulár
Juis	: Dr. Samuel da Costa Pacheco
Prokuradór	: Dr. Napoleão Soares da Silva
Defeza	: Dr. Francisco Caetano Martins
Tipu pena	: Absolve

Iha 01 Juñu 2017, Tribunál Distritál Suai prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu BYB hasoru nia feen, iha Distritu Covalima.

Akuzasaun hosi Prokuradór

Prokuradòr akuza katak iha 07 Marsu 2017, arguidu tuku dala 1 iha lezada nia hasan parte karuk. Agresaun ne'e rezulta lezada sofre moras no bubu iha lezada nia oin.

Prokuradòr akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3 no 35 (b) LKVD.

Produsaun ba prova

Iha julgamentu, arguidu nega faktus hotu iha akuzasaun, arguidu mós deklara katak iha akontesementu ne'e arguidu toba hela, lezada mak rasta arguidu hosi kama leten no tata arguidu nia liman, nune'e arguidu hisik liman no kona lezada. Aleinde ne'e lezada mós deklara katak arguidu la tuku lezada, maibé arguidu hisik liman mak kona lezada.

Alegasaun finál

Prokuradór haktuir katak arguidu nega faktus iha akuzasaun no reforsa mós hosi lezada. Mezmu nune'e Prokuradór nafatin maintein nia akuzasaun no husu ba Tribunál atu kondena arguidu.

Enkuantu Defeza haktuir katak arguidu rekuza totál faktus sira iha akuzasaun no reforsa mós hosi lezada, tanba ne'e husu ba Tribunál atu absolve arguidu hosi prosesu.

Desizaun

Depoisde avalia faktus ne'ebé prodús durante julgamentu, Tribunál la prova katak arguidu komete krime hasoru lezada. Bazeia konsiderasaun hirak ne'e Tribunál konklui prosesu ne'e no absolve arguidu hosi prosesu.

3. Krime abuzu seksuál ba menór ho agravasaun

Nú. Prosesu	: 0011/16.MFSIC
Kompozisaun Tribunál	: Koletivu
Juis	: Dr Nesson Sarmento Dr. Samuel da Costa Pacheco Dr. Argentino Luisa Nunes
Prokuradór	: Dr. Napoleaoon Soares da Silva
Defeza	: Dr. Albino de Jesus Pereira
Tipu pena	: Pena prizaun tinan 14

Iha 13 Juñu 2017, Tribunál Distritál Suai prezide julgamentu leitura akordaun ba krime abuza seksuál ba menór ne'ebé envolve arguidu PM nu'udar viziñu hasoru lezada R (tinan 6), iha Distritu Manufahi.

Akuzasaun hosi Prokuradór

Prokurdór akuza katak iha 17 Outubru 2016, lezada halimar hela iha ninia uma kotuk no arguidu bolu lezada ba iha arguidu nia uma laran. Hafoin lezada ba tuir arguidu ho forsa obriga kolu lezada nia kalsa no arguidu mós hasai nia kalsa arguidu haruka lezada tuur iha arguidu nia hitin no obriga hatama nia orgaun seksuál ba lezada nia orgaun seksuál dala rua. Agresaun ne'e rezulta lezada sofre moras no nakles iha lezada nia orgaun seksuál. Kazu ne'e aneksa mós ho relotoriu mediku hosi Pradet.

Prokurdór akuza arguidu kontra artigu 177 alinea (a) Kódigu Penál kona-ba abuzu seksuál ba menór ho moldura penal tinan 5 to tinan 20 iha prizaun no konjuga ho artigu 182 alinea (a) kona-ba agravasaun.

Produsaun ba prova

Iha julgamentu arguidu konfesa faktus hotu iha akuzasun, arrepende ona nia hahalok no foin primeira-vez mai hatan iha Tribunál. Iha parte seluk lezada konfirma no kontinua reforsa faktus sira iha akuzasaun.

Alegasaun finál

Prokuradòr konsidera arguidu provadu komete krime hasoru lezada, tuir faktus ne'ebé mai hosi arguidu ninia konfisaun rasik, relotoriu médiku no konfirmasaun hosi lezada. Tanba ne'e husu ba Tribunál atu kondena arguidu ho pena prizaun tinan 18.

Enkuantu Defeza husu ba Tribunál atu aplika pena ne'ebé adekuada ba arguidu, tanba arguidu konfesa faktus hotu iha akuzasaun, arrepende ona nia hahalok no foin primeira-vez mai hatan iha Tribunál.

Desizaun

Depoisde avalia faktus provadu sira ne'ebé prodús durante julgamentu, Tribunál prova katak arguidu provadu komete krime hasoru lezada bazeia faktu sira ne'ebé mai hosi deklarasaun arguidu, depoimenta lezada nomós relotoriu médiku. Tanba ne'e Tribunál konklui prosesu ne'e no kondena arguidu ho pena prizaun tinan 14.

4. Krime omisídiu agravadu

Nú. Prosesu	:	0005/15.BBBBV
Kompozisaun Tribunál	:	Kolektivu
Juis	:	Dra. Florensia Freitas Dr. Samuel da Costa Pacheco Dr. Nasson Sarmento
Prokuradór	:	Dr. João Marques
Defeza	:	Dr. Marçal Mascarinhhas
Tipu pena	:	Pena prizaun no indemnizasaun sívil

Iha 16 Juňu 2017, Tribunál Distrital Suai prezide julgamentu leitura akordaun ba krime omisídu agravadu ne'ebé envolve arguidu AN no AdN hasoru lezadu AdCB, lezada JdS no AdC, iha Distritu Bobonaro.

Akuzasaun hosi Prokuradór

Prokuradòr akuza katak, iha 09 Maiu 2015, arguidu sira ho lezadu diskute malu kona-ba rai uma fatin nian. Durante haksesuk malu arguidu sira hatete ba lezadu katak “*kuandu Ó halo uma iha fatin ne'e Ó mate motuk.*”

Tuir mai iha 15 Maiu 2015, iha tuku 08:00 kalan, lezada JdS ho nia alin AdC tein iha dapur, depoisde tein hotu lezada sira suru etu lori ba uma laran, maibé lakteur lezada sira horon hanesan i's gazolina hosi dapur laran. Wainhira lezada JdS ho nia alin ba fali dapur atu foti bikan haree arguidu AN lori tijora tesi hela kalen dapur nian no arguidu AdN lori gazolina jergen litru 5 no gazolina iha aqua bot nakonu. Tanba tauk lezada ho nia alin tama fali ba uma laran no fanu sira nia aman ne'ebé toba hela, maibé sira nia aman toba dukur loos no la hader. Tanba tauk lezada ho nia alin toba iha sira nia aman nia sorin, no liu tiha minutu 20, lezada JdS rona tarutu maka'as no derepenti ahi sae haleu tiha uma hodi han motuk tiha lezada nia aman ho lezada nia alin iha uma laran. Enkuantu lezada JdS nia isin ahi han kanek hotu, maibé konsege salva hosi Sr. Balbino Nascimento no lori kendas lezada ba halo tratamentu iha Óspital Referal Maliana no baixa durante semana 2. Aktu ne'e rezulta ema nain rua mate no hamosu prejuizu hanesan sasan sira iha uma laran sura ba osan hamutuk US\$3,500.00 ulsuku mean 6 ho folin US\$1,500.00 belak mean antig 8 ho folin US\$800.00 mortel antig talin 9 ho folin US\$13,500.00. Totál prejuizu hamutuk US\$26,900.00. Kazu ne'e aneksa mós ho relatoriu médiķi hosi Óspital. Iha 17 Maiu 2015, arguidu sira ho sira nia familia ses-an hosi sira nia hela fatin ba Suku Tebabui Bobonaro.

Prokuradór akuza arguidu kontra artigu 139 Kódigu Penál kona-ba krime omisídu agaravadu ho nia moldura penal tinan 12 too tinan 25 no artigu 23 KP kona-ba tentativa, artigu 24 KP kona-ba tentativa nia punibilidade no artigu 263 alinea 1 kona-ba krime inséndiu ho nia moldura penal hosi tinan 2 to 8.

Produsaun ba prova

Iha julgamentu, arguidu sira nega faktus hotu iha akuzasaun, arguidu sira mós deklara katak iha akontesementu ne'e arguidu sira nonton hela televizaun iha sira nia uma laran. Iha parte seluk lezada konfirma no kontinua reforsa faktus sira iha akuzasaun.

Testemuña BN deklara katak antes ne'e arguidu sira iha ona problema kona-ba rai uma fatin ho lezadu. Arguidu sira ameasa atu sunu motuk lezadu maibé iha akontesementu ne'e testemuña la haree ho matan se mak sunu uma, testemuña rona deit hosi lezada.

Alegasaun finál

Prokuradòr konsidera arguidu sira provadu komete krime konkursu hodi halo mate lezadu ho nia oan. Tanba ne'e husu ba Tribunál atu kondena arguidu sira ho pena prizaun tinan 29 no selu mós indemnizasaun.

Enkuantu Defeza husu ba Tribunál atu absolve arguidu sira, bazeia ba deklarasaun arguidu sira nian katak iha akontesementu ne'e sira nonton hela. Defeza mós intende katak iha akontesementu ne'e ahi iha dapur laran mós mate hela, tanba ne'e lazada labele identifika lolos se mak iha kalen leten.

Desizaun

Depoisde avalia faktus provadu sira ne'ebé produs durante julgamentu, Tribunál konsidera faktus hotu provadu. Konsiderasun ne'e bazeia ba depoimentu testemuña sira nian no lezada JdS, nune'e Tribunál konklui prosesu ne'e no kondena arguidu AN ho pena prizaun tinan 28, ba arguidu AdN Tribunál kondena ho pena prizaun tinan 26. Tribunál mós kondena arguidu sira selu indemnizasaun US\$15,000.00 ba lezada.

5. Krime ameasa

Nú. Prosesu	: 0084/16.PDSUA.
Kompozisaun Tribunál	: Singulár
Juis	: Dr. Constâncio Barros Basmery
Prokuradór	: Dr. Napoleão Soares da Silva
Defeza	: Dr. Francisco Caetano Martins
Tipu pena	: Omologa dezisténsia keixa

Iha 21 Juñu 2017, Tribunál Distritál Suai prezide prosesu tentativa konsiliaisaun ba krime ameasa ne'ebé envolve arguidu Jesuiňu do Carmo hasoru lezadu Rui do Carmo, iha Distritu Covalima.

Akuzasaun hosi Prokuradór

Prokuradór akuza katak iha 23 Juñu 2016, arguidu ameasa lezadu dehan “mauhu intelejen no milisi hau sei tuku mate o,” lezadu sente ameasadu no la seguru atu halo movimentu ba fatin ruma. Kazu ne'e akontesetese wainhira arguidu ho lezadu diskute malu kona-ba mina Timor nian no lezadu hateten katak saláriu funzionariu nian mai hosi mina Timor nian, tanba ne'e arguidu hirus.

Prokuradór akuza arguidu kontra artigu 157 Kódigu Penál kona-ba ameasa ho nia moldura penal tinan 2 ka multa.

Produsaun ba prova

Bazeia ba artigu 262 KPP kona-ba tentativa ba konsilasaun, tanba ne'e antes tama ba produsaun ba prova, juis husu atu halo tentativa konsilasaun ba arguidu no lezadu.

Iha prosesu konsiliaisaun ne'e, arguidu husu diskulpa ba lezadu, arrepende ona nia hahalok no promete sei la komete tan krime seluk hasoru lezadu iha futuru. Lezadu simu no konkorda ho pedidu ne'e no husu ba Tribunál atu dezisté ninia-keixa hasoru arguidu.

Alegasaun finál

Prokuradòr no Defeza apresia ho akordu dame ne'ebé parte rua deside ona no husu ba Tribunál atu omologa prosesu ne'e.

Desizaun

Bazeia ba pedidu dezisténsia hosi lezadu no akordu dame hosi parte sira, Tribunál konklui prosesu ne'e no omologa akordu ne'e.

6. Krime ofensa ba integridade física simples ho natureza violénsia doméstika

Nú. Prosesu	: 003/16. BBCLC
Kompozisaun Tribunál	: Singulár
Juis	: Dr. Samuel da Costa Pacheco
Prokuradór	: Dr. Ambrosio Rangel Freitas
Defeza	: Dr. Manuel Amaral
Tipu pena	: Pena prizaun fulan 6 suspende tinan 1

Iha 27 Juñu 2017, Tribunál Distritál Suai liu hosi Tribunál movél iha Distritu Bobonaro, prezide julgamentu leitura sentesa ba krime ofensa ba integridade física simples ne'ebé envolve arguidu ASM hasoru nia feen, iha Distritu Bobonaro.

Akuzasaun hosi Prokuradór

Prokuradór akuza katak iha 01 Dezembru 2016, arguidu buti lezada nia kakorok, riba lezada ba rai no sama lezada nia kabun. Arguidu foin hapara nia agresaun ne'e wainhira lezada nia inan mosu mai no halo intervensaun ba arguidu. Agresaun ne'e rezulta lezada sofre moras iha kakorok no bubu iha kotuk laran.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3 no 35 (b) LKVD.

Produsaun ba prova

Iha julgamentu, arguidu konfesa faktus hotu iha akuzasaun, arguidu mós deklara katak arrepende ona nia hahalok. Iha parte seluk lezadu konfirma no kontinua reforsa faktus sira iha akuzasaun.

Alegasaun finál

Prokuradór mantein nia akuzasaun no husu ba Tribunál atu kondena arguidu ho pena prizaun tinan 2 suspende ba tinan 2 fulan 6 nu'udar prevensaun atu iha futuru arguidu la komete tan krime hanesan.

Iha parte seluk, Defeza husu ba Tribunál atu aplika pena ne'ebé justu no adekuadu ba arguidu, tanba arguidu konfesa faktus hotu iha akuzasaun, arrepende ona nia hahalok.

Desizaun

Depoisde avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena prizaun fulan 6 suspende ba tinan 1.

7. Krime ofensa ba integridade física simples ho natureza violénsia doméstika

Nú. Prosesu	: 0001/17.BBMLV
Kompozisaun Tribunál	: Singulár
Juis	: Dr. Samuel da Costa Pacheco
Prokuradór	: Dr. Ambrosio Rangel Freitas
Defeza	: Dr. Manuel Amaral
Tipu pena	: Pena prizaun fulan 6 suspende ba tinan 1

Iha 27 Juñu 2017, Tribunál Distritál Suai liuhosi Tribunál movél iha Distritu Bobonaro, prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu VM hasoru nia feen, iha Distritu Bobonaro.

Akuzasaun hosi Prokuradór

Prokuradòr akuza katak iha 31 Dezembru 2016, arguidu rasta lezada nia fuuk no tuku dala 1 iha lezada nia kabaas. Agresaun ne'e rezulta lezada sofre moras no bubi iha lezada nia kabaas.

Prokuradòr akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3 no 35 (b) LKVD.

Produsaun ba prova

Iha julgamentu, arguidu konfesa faktus hotu iha akuzasaun, arrepende ona nia hahalok no promete iha futuru sei la komete tan krime hasoru lezada. Iha parte seluk lezada konfirma no kontinua reforsa faktus sira iha akuzasaun.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian no konfirma mós hosi lezada. Tanba ne'e husu ba Tribunál atu kondena arguidu ho pena prizaun tinan 2 fulan 6 suspende ba tinan 3.

Enkuantu Defeza husu ba Tribunál atu kondena arguidu ho pena ne'ebé adekuadu, tanba arguidu konfesa faktus hotu iha akuzasaun no arrepende ona ninia hahalok.

Desizaun

Tribunál prova katak arguidu provadu komete krime tuir faktus iha akuzasaun Prokuradór. Tribunál konklui prosesu ne'e no kondena arguidu ho pena prizaun fulan 6 suspende ba tinan 1 no selu kustu judisiál US\$50.00.

8. Krime Kontrabandu

Nú. Prosesu	: 0113/15.BBMLV
Kompozisaun Tribunál	: Koletivu
Juis	: Dr. Samuel da Costa Pacheco Dr. Constancio Barros Basmery Dr. Benjamin Barros
Prokuradór	: Dr. Matias Soares
Defeza	: Dr. Albino de Jesus
Tipu pena	: Pena multa

Iha 27 Juňu 2017, Tribunál Distritál Suai liuhosi Tribunál movél iha Distritu Bobonaro, prezide julgamentu leitura akordaun ba krime kontrabandu ne'ebé envolve arguida Rofina de Jesus, Cicilia Coe no arguidu Benjamin Bere hasoru Dirasaun Imposto no Alfandega Estadu RDTL nian, iha Distritu Bobonaro.

Akuzasaun hosi Prokuradór

Prokuradór akuza katak iha 30 Agusto 2016, arguida Rofina telefone ba arguida Cicilia atu ba sosa kilat anin nian lolon 3 iha Indonezia. Kilat ne'e ho marka Sharp no Tiger 30 no kada kilat ho folin US\$50.00, nune'e total osan hamutuk US\$150.00. Iha 01 Setembru 2016, arguida Cicilia tama ba Indonezia hodi sosa kilat anin no arguida tama mai Timor liuhosi dalan ilegal no husu ajuda ba arguidu Benjamin lori fodik kilat ba mota laran iha area fronteira mota masin Batugade no hetan kapturasaun hosi Polisia-UPF, tanba laiha lisensa hosi Alfandega.

Prokuradór akuza arguidu kontra artigu 316 Kódigu Penál kona-ba krime kontrabandu ho nia moldura penal tinan 2 to tinan 6 ka multa.

Produsaun ba prova

Iha julgamentu arguida konfesa faktus hotu iha akuzasaun, arrepende ona nia hahalok no foin primeira-vez mai hatan iha Tribunál.

Alegasaun finál

Prokuradór husu ba Tribunál atu kondena arguida sira no arguidu ho pena prizaun tinan 2 suspende ba tinan 3 nu'udar prevensaun atu iha futuru arguida sira no arguidu la repete tan krime hanesan.

Enkuantu Defeza husu ba Tribunál atu aplika pena ne'ebé adekuada ba arguidu no arguida sira, tanba konfesa no arrepende ona sira nia hahalok.

Desizaun

Depoisde avalia faktus provadu sira ne'ebé prodús durante julgamentu, Tribunál konklui prosesu ne'e no kondena arguida sira no arguidu ho pena multa US\$60.00 no sei selu US\$1.00 kada loron durante loron 60. Tribunál mós fiksa pena alternativa durante loron 40 prizaun, wainhira arguidu no arguida sira la kumpri pena multa ne'e.

9. Krime la halo tuir obrigasaun alimentár

Nú. Prosesu	: 0089/16.BBMLV
Kompozisaun Tribunál	: Singulár
Juis	: Dr. Samuel da Costa Pacheco
Prokuradór	: Dr. Jacinto Babo Soares
Defeza	: Dr. Manuel Amaral
Tipu pena	: Omologa dezisténsia keixa

Iha 27 Juňu 2017, Tribunál Distritál Suai liuhosi Tribunál movél iha Distritu Bobonaro, prezide prosesu tentativa konsiliasaun ba krime la halo tuir obrigasaun alimentar ne'ebé envolve arguidu AdC hasoru lezada DFGC, iha Distritu Bobonaro.

Akuzasaun hosi Prokuradór

Prokuradór akuza katak iha 15 Abril 2016, arguidu diskuti malu ho lezada no sai hosi uma nunka fo alimentasaun ba nia oan nain 4 ne'ebé ho idade menór hela.

Prokuradór akuza arguidu kontra artigu 225 KP kona-ba la halo tuir obrigasaun alimentar ho moldura penal to'o tinan 3 ka multa.

Produsaun ba prova

Bazeia ba artigu 262 KPP kona-ba tentativa ba konsiliasaun, antes tama ba produsaun ba prova, juis husu atu halo tentativa konsiliasaun ba arguidu no lezada.

Iha prosesu konsiliasaun ne'e, arguidu deklara katak nia pronto atu fó osan kada fulan US\$70.00 ba nia oan nain 4. Lezada konkorda ho pedidu ne'e husu ba Tribunál atu dezisténsia ninia-keixa hasoru arguidu.

Alegasaun finál

Prokuradór no Defeza apresia ho akordu dame ne'ebé parte rua deside ona no husu ba Tribunál atu omologa akordu ne'e.

Desizaun

Bazeia ba pedidu dezisténsia hosi lezada no akordu dame hosi parte sira, Tribunál konklui prosesu ne'e no omologa akordu ne'e.

10. Krime ofensa ba integridade fizika simples

Nú. Prosesu	: 0011/16.BBLLT
Kompozisaun Tribunál	: Singulár
Juis	: Dr. Alvaro Maria Freitas
Prokuradór	: Dr. Ambrosio Rangel Freitas
Defeza	: Dr. Albino de Jesus Pereira
Tipu pena	: Omologa dezisténsia keixa

Iha 28 Juňu 2017, Tribunál Distritál Suai liuhosi Tribunál Movél iha Distritu Bobonaro, prezide prosesu tentativa konsiliasaun ba krime ofensa ba integridade fizika simples ne'ebé envolve arguidu, Francisco Manek, Crispin Cardoso no Jose Crispin Cardoso hasoru lezadu Domingos Simão, iha Distritu Bobonaro.

Akuzasaun hosi Prokuradór

Prokuradòr akuza katak iha Ioron 05 Dezembru 2016, arguidu sira ho nervoju tuku no tebe lezadu. Agresaun ne'e resulta lezadu sofre moras no bubu iha lezadu nia oin no hasan. Kazu ne'e akontese, wainhira lezadu no arguidu sira partisipa serimonia kultura no lezadu larespeitu lia nain ne'ebé koalia hela.

Prokuradòr akuza arguidu kontra artigu 145 kona-ba ofensa ba integridade fizika simples ho ninia moldura penal tinan 3 ka multa.

Produsaun ba prova

Bazeia ba artigu 262 KPP kona-ba tentativa ba konsiliasaun, no tanba ne'e antes tama ba produsaun ba prova, juis husu atu halo tentativa konsiliasaun ba arguidu sira no lezadu.

Iha prosesu konsiliasaun ne'e, arguidu sira husu diskulpa ba lezadu no fó ta'is 1 no osan US\$60,00 ba lezadu. Arguidu sira dekara katak arrepende ona sira nia hahalok no promete iha futuru sei la komete tan krime hasoru lezadu no ema seluk.

Alegasaun finál

Prokuradòr no Defeza apresia ho akordu dame ne'ebé parte sira deside ona no husu ba Tribunál atu omologa prosesu ne'e.

Desizaun

Bazeia ba pedidu dezisténsia hosi lezadu no akordu dame hosi parte sira, Tribunál konklui prosesu ne'e no omologa akordu ne'e.

11. Krime ofensa ba integridade física simples ho natureza violénsia doméstika

Nú. Prosesu	: 0002/16.BBATB
Kompozisaun Tribunál	: Singulár
Juis	: Dr. Alvaro Maria Freitas
Prokuradór	: Dr. Ambrosio Rangel Freitas
Defeza	: Dr. Albino de Jesus Pereira
Tipu pena	: Pena prizaun fulan 3 suspende tinan 1

Iha 28 Juñu 2017, Tribunál Distritál Suai liuhosi Tribunal Movél iha Distritu Bobonaro, prezide julgamentu leitura sentesa ba krime ofensa ba integridade física simples ne'ebé envolve arguidu FAdS hasoru nia feen, iha Distritu Bobonaro.

Akuzasaun hosi Prokuradór

Prokuradòr akuza katak iha 18 Janeiru 2016, arguidu basa dala 1 iha lezada nia hasan parte karuk. Agresaun ne'e resulta lezada monu ba rai no lezada nia ulun kona iha piku resulta moras no bubu iha lezada nia ulun.

Prokuradòr akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3 no 35 alinea (b) LKVD.

Produsaun ba prova

Iha julgamentu, arguidu konfesa faktus hotu iha akuzasaun, arrepende ona nia hahalok no foin primeira-vez mai hatan iha Tribunál. Iha parte seluk lezada konfirma no kontinua reforsa faktus sira iha akuzasaun.

Alegasaun finál

Prokuradór mantein nia akuzasaun no husu ba Tribunál atu kondena arguidu ho pena prizaun fulan 4 suspende ba 1 nu'udar prevensaun atu iha futuru arguidu la komete tan krime hasoru lezada.

Entretantu Defeza husu ba Tribunál atu aplika pena ne'ebé justu no adekuada ba arguidu, tanba arguidu konfesa faktus hotu iha akuzasaun no arrepende ona nia hahalok.

Desizaun

Tribunál prova katak arguidu provadu komete krime hasoru lezada no kondena arguidu ho pena prizaun fulan 3 suspende ba tinan 1.

12. Krime ofensa ba integridade física simples ho natureza violénsia doméstika

Nú. Prosesu	: 0013/15.BBBBV
Kompozisaun Tribunál	: Singulár
Juis	: Dra. Florenzia Freitas
Prokuradór	: Dr. Matias Soares
Defeza	: Dr. Francisco Caetano Martins
Tipu pena	: Pena prizaun fulan 6 suspende tinan 1

Iha 28 Juñu 2017, Tribunál Distritál Suai liuhosi Tribunál Movél iha Distritu Bobonaro, prezide julgamentu leitura sentesa ba krime ofensa ba integridade física simples ho natureza violénsia doméstika ne'ebé envolve arguidu JdS hasoru nia feen, iha Distritu Bobonaro.

Akuzasaun hosi Prokuradór

Prokuradòr akuza katak iha 02 Dezembru 2015, arguidu foti ai-pedasuk ki'ik baku dala 1 iha lezada nia ulun, lezada koko atu halai arguidu foti tan besi rohan ki'ik ida baku dala 1 iha lezada nia kelen. Agresaun ne'e rezulta lezada sofre kanek iha lezada nia ulun no bubu iha lezada nia kelen.

Prokuradòr akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3 no 35 alinea (b) LKVD.

Produsaun ba provas

Iha julgamentu, arguidu uza direitu nonok. Enkuantu, iha parte seluk lezada konfirma no kontinua reforsa faktus sira iha akuzasaun.

Alegasaun finál

Prokuradòr konsidera arguidu provadu komete krime hasoru lezada, tanba ne'e husu ba Tribunál atu kondena arguidu ho pena prizaun fulan 6 suspende ba 1. Iha parte seluk Defeza husu ba Tribunál atu aplika pena ne'ebé adekuadu ba arguidu.

Desizaun

Depoisde avalia faktus ne'ebé prodús durante julgamentu, Tribunál prova katak arguidu provadu komete krime hasoru lezada tuir faktu sira ne'ebé akuza ba arguidu. Tanba

ne'e Tribunál konklui prosesu ne'e no kondena arguidu ho pena prizaun fulan 6 suspende ba tinan 1 no selu kustu judisíal US\$10.00

13. Krime ofensa ba integridade física simples ho natureza violénsia doméstika

Nú. Prosesu	: 0015/16.BBBBV
Kompozisaun Tribunál	: Singulár
Juis	: Dra. Florensa Freitas
Prokuradór	: Dr. Matias Soares
Defeza	: Dr. Francisco Caetano Martins
Tipu pena	: Pena prizaun tinan 1 suspende tinan 2

Iha 28 Juñu 2017, Tribunál Distritál Suai liuhosi Tribunál Movél iha Distritu Bobonaro, prezide julgamentu leitura sentesa ba krime ofensa ba integridade física simples ho natureza violénsia doméstika ne'ebé envolve arguidu BdS hasoru nia feen, iha Distritu Bobonaro.

Akuzasaun hosi Prokuradór

Prokuradòr akuza katak iha 19 Novembru 2016, arguidu kaer lezada nia ulun baku ba didin lolon no tuku dala 2 iha lezada nia hasan parte karuk, arguidu kontinua tuku dala 4 iha lezada nia ain-tuur no ain-kabun. Agresaun ne'e rezulta lezada sofre moras no monu ba rai no bubu iha lezada nia ulun no hasan.

Prokuradòr akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3 no 35 (b) LKVD.

Produsaun ba prova

Iha julgamentu arguidu uza direitu nonok no iha parte seluk lezada konfirma no kontinua mantein faktus sira iha akuzasaun.

Alegasaun finál

Prokuradór konsidera arguidu provadu komete krime hasoru lezada mezmu arguidu hili direitu nonok, maibé lezada kontinua konfirma faktus sira iha akuzasaun. Tanba ne'e husu ba Tribunál atu kondena arguidu ho pena prizaun tinan 1 suspende ba tinan 2. Enkuantu Defeza husu ba Tribunál atu aplika pena ne'ebé justu no adekuadu ba arguidu.

Desizaun

Depoisde avalia faktus ne'ebé prodús durante julgamentu, Tribunál prova katak arguidu provadu komete krime hasoru lezada no kondena arguidu ho pena prizaun tinan 1 suspende ba tinan 2.

14. Krime ofensa ba integridade física simples ho natureza violénsia doméstika

Nú. Prosesu	: 00125/16.BBMLV
Kompozisaun Tribunál	: Singulár
Juis	: Dr. Argentino Luisa Nunes
Prokuradór	: Dr. Jacinto Babo Soares
Defeza	: Dr. Manuel Amaral
Tipu pena	: Pena prizaun fulan 6 suspende ba tinan 1

Iha 28 Juñu 2017, Tribunál Distritál Suai liuhosi Tribunál Movél iha Distritu Bobonaro, prezide julgamentu leitura sentensa ba krime ofensa ba integridade física simples ne'ebé envolve arguidu LC hasoru nia feen, iha Distritu Bobonaro.

Akuzasaun hosi Prokuradór

Prokuradòr akuza katak iha 28 Setembru 2016, arguidu basa dala 3 iha lezada nia hasan parte karuk, tuku dala 1 iha lezada nia kotuk laran no tuku dala 1 iha lezada nia tilun hun. Agresaun ne'e rezulta lezada sofre moras no bubu iha lezada nia hasan no tilun hun.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3 no 35 (b) LKVD.

Produsaun ba prova

Iha julgamentu arguidu konfesa faktus hotu iha akuzasaun no arguidu mós deklara katak arrepende ona nia hahalok. Aleinde ne'e, lezada mós kontinua mantein no reforsa faktus sira iha akuzasaun.

Alegasaun finál

Prokuradór konsidera arguidu provadu komete krime hasoru lezada, tanba ne'e husu ba Tribunál atu kondena arguidu ho pena prizaun no ezekusaun suspensaun. Enkuantu Defeza husu ba Tribunál atu aplika pena ne'ebé adekuadu ba arguidu, tanba arguidu konfesa faktus hotu iha akuzasaun no arrepende ona nia hahalok.

Desizaun

Depoisde avalia faktus provadu sira ne'ebé prodús durante julgamentu, Tribunál konklui prosesu ne'e no kondena arguidu ho pena prizaun fulan 6 suspende ba tinan 1.

15. Krime ofensa ba integridade fízika simples ho natureza violénsia doméstika

Nú. Prosesu : 0072/16.BBMLV
Kompozisaun Tribunál : Singulár
Juis : Dr. Alvaro Maria Freitas
Prokuradór : Dr. Jacinto Babo Soares
Defeza : Dr. Francisco Caetano Martins
Tipu pena : Pena prizaun fulan 6 suspende tinan 1

Iha 29 Juňu 2017, Tribunál Distritál Suai liuhosi Tribunál Movél iha Distritu Bobonaro, prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu FB hasoru nia feen, iha Distritu Bobonaro.

Akuzasaun hosi Prokuradór

Prokuradòr akuza katak iha 12 Juňu 2015, arguidu basa dala 1 iha lezada nia hasan parte loos. Tuirmai, iha 13 Juňu 2015, arguidu rakut lezada nia fuuk no tuku dala 1 iha lezada nia matan fukun. Agresaun ne'e rezulta lezada sofre moras no bubu iha matan fukun.

Prokuradòr akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3 no 35 (b) LKVD.

Produsaun ba prova

Iha julgamentu, arguidu konfesa faktus hotu iha akuzasaun no promete sei la komete tan krime hasoru lezada iha futuru. Iha parte seluk lezada konfirma no kontinua reforsa faktus sira iha akuzasaun.

Alegasaun finál

Prokuradó konsidera arguidu provadu komete krime tuir akuzasaun, tanba ne'e husu ba Tribunál atu kondena arguidu ho pena prizaun no ezekusaun suspensaun.

Iha parte seluk, Defeza husu ba Tribunál atu kondena arguidu ho pena ne'ebé adekuada, tanba arguidu konfesa faktus hotu iha akuzasaun no promete iha futuru sei la komete tan krime hasoru lezada.

Desizaun

Tribunál konklui prosesu ne'e no kondena arguidu ho pena prizaun fulan 8 suspende ba tinan 2 no selu kustu judisial US\$25.00

16. Krime ofensa ba integridade física simples ho natureza violénsia doméstika

Nú. Prosesu	: 0012/16.BBATB
Kompozisaun Tribunál	: Singulár
Juis	: Dr. Alvaro Maria Freitas
Prokuradór	: Dr. Jacinto Babo Soares
Defeza	: Dr. Francisco Caetano Martins
Tipu pena	: Pena prizaun fulan 5 suspende tinan 1

Iha 29 Juñu 2017, Tribunál Distritál Suai liuhosi Tribunál Movél iha Distritu Bobonaro, prezide julgamentu leitura sentesa ba krime ofensa ba integridade física simples ho natureza violénsia doméstika ne'ebé envolve arguidu AP hasoru nia feen, iha Distritu Bobonaro.

Akuzasaun hosi Prokuradór

Prokuradór akuza katak iha 30 Novembru 2016, arguidu basa dala 2 lezada nia matan fukun parte loos, tuku dala 3 iha lezada nia kotuk laran no tuku dala 1 iha lezada nia liman parte karuk. Agresaun ne'e resulta lezada sofre moras no bubu iha lezada nia matan fukun no kotuk laran.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3 no 35 (b) LKVD.

Produsaun ba provas

Iha julgamentu, arguidu konfesa faktus hotu iha akuzasaun no deklara katak arrepende ona nia hahalok no diak malu ona ho lezada. Iha parte seluk lezada kontinua reforsa no konfirma faktus sira iha akuzasaun.

Alegasaun finál

Prokuradór konsidera arguidu provadu komete krime hasoru lezada. Mesmu nune'e Prokuradór konsidera katak arguidu konfesa no arrepende ona nia hahalok. Tanba ne'e husu ba Tribunál atu kondena arguidu ho pena prizaun ho ezekusaun suspensaun.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok. Tanba ne'e husu ba Tribunál atu aplika pena ne'ebé adekuada ba arguidu.

Desizaun

Bazeia ba faktus sira ne'ebé produs durante julgamentu, Tribunál konklui prosesu ne'e no kondena arguidu ho pena prizaun fulan 5 suspende ba tinan 1.

Atu hetan informasaun kompleitu, favor kontaktu:

Luis de Oliveira Sampaio
Diretor Executivo JSMP
Diresaun e-mail: luis@jsmp.tl